



29 Juli 2023

Perb. Rasul 18: 18-23



Ikut Erberita



Piga-piga abad si lepas, lit sekalak pengkotbah ersuruh ukurna guna erberita kerna Kata Dibata man kalak si lit i bas pedalaman si lenga nandai Kristus. Asum ia erberita man nterem jelma, lit sekalak si maju janah mereken ia kertas. I bas kertas e lit tulisen, kenca iogena kertas e, sengget ia erkiteken tulisenna e me: ‘bodoh.’ Ndekah ia jeneng natap kertas e, sedih ia, kecewa ia. Tapi la ingadikenna nuriken Kata Dibata. Nina man anak kuta ndai, “Senina ras turang, nggo rusur kwaloken surat. Janah i bas surat si kwaloken, megati i je tertulis kerna gelar ras alamat pengirim. Tapi, enda denga kwaloken surat lit gelarna i je tapi la lit isina.” E maka ilanjutkenna erberita kerna Kata Dibata janah mbue kalak tek ras ngaloken Jesus.

Ikut erberita kerna Tuhan Jesus labo mesunah. Banci saja mbue penulaken, kiniseran si banci ialami i bas erberita. E maka i bas erberita perlu sada strategi. Kurang ulina adi i bas erberita kita sisada (*single fighter*), sabap adi bage asa ndigan pe berita si meriah enda labo banci seh man kerina jelma. Jadi, perlu partisipasi ras keterlibatan kalak si tek man Tuhan. Paulus pe ngajuk enterem kalak jadi temanna erberita, bagi si Persila ras Akuila. Reh teremna si muat bagin, berita si meriah e reh pedasna tersehi. Strategi Paulus, iajarina lebe teman temanna e, iperlengkapina alu erbage pemeteh ras itotokenna. Kenca isuruhna berkat ku kuta-kuta lako erberita tetap iperdiatekenna, (imonitoringna) janah adi lit kesempatan iulihina ka guna jumpa ras teman-temanna e.

Erberita i bas zaman gundari e, labo cukup serayan Tuhan ngenca. Dahin erberita e man kerina kalak si tek. Erberita si meriah e enggo jadi orat geluhta. E maka sibuatlah baginta ikut erberita man kalak si lenga nadai Tuhan Jesus entah si kote denga kinitekenna. Muat bagin la arus mekarus entah meros, ula meruntus. Notoken perpulungen I bas kecibal geluhna, e pe enggo muat bagin i bas erberita. Mere alu ukur meriah encukupken keperlun erberita e pe enggo muat bagi.

Ketika Allah melihat seseorang yang tidak berhenti – menyerah, Ia melihat ke bawah dan berkata, “Ada seseorang yang bisa Aku pakai”. (John L. Mason, *An Enemy Called Average*, 57)